

# Sò chjose e piaghje, ma chì n'hè di a muntagna ?



I spassighjatori di a muntagna ùn sanu micca s'elli puderanu pigghjà altezza dopu u scunfinamentu. PHOTOS XAVIER GRIMALDI

Una cosa ch'ùn hè micca pruibita sarà per forza autorizata ? A sapemu, sin'à u primu di ghjugnu, e piaghje fermeranu chjose à u publicu. Ma chì ne serà di a muntagna dopu l'ondecì di maghju ? Ogni veranu, i primi giranduloni pigghjanu a direzzione di l'alta strada, seguitanu i chjassi di muntagna mentre qualchi ghjornu, passendu un paghjù di note in i rifugii o i piazzelle. Quist'annu, dopu dui mesi di cunfinamentu,

a voglia di pigghjà l'aria puderia caghunà un ingorgu da l'Alcúndina à u Cintu.

Ma per u mumentu, ùn si sà micca s'è a muntagna sarà aperta à e visite. « Noi, à u livellu amministrativu, semu pronti, spiega José Filippi, direttore di u Parcu di Corsica. I guardiani di rifugii sò stati designati, e riserve sò prese. Ma aspettemu avà e direttive di u Statu è di u prefettu. Oghje, ùn sapemu nulla. »



Altra incognita : apreranu i rifugii di l'alta strada dopu à u primu di ghjugnu ?

## « Avemu pocu infurmazione »

Da oghje à a fine di a settimana, parecchi riunioni devenu permette di vede chjaru. A sola certezza hè ch'ùn si pò micca andà in muntagna sin'à l'ondecì di maghju. Ma dopu ? « Noi dinò, avemu pocu infurmazione, dice Marie Sachot, cumandante di u PGHM di Corsica, i gendarmi in

carica di a muntagna. E discussione pruseguenu, ci seranu dati l'ordine da qui à pocu. Speremu ancu sta sera. » Oghje, Tony Mouchet, cumandante d'i gendarmi corsi, deve scambierà cù Christian Rodriguez, direttore generale di a gendarmeria nazziunale, per sviluppu un pianu di scunfinamentu di a muntagna. « Ancu s'è aprenu torna i chjassi di muntagna, ùn si sà micca s'elli apreranu dinò i

rifugii. Ci sò regule da rispettà trà i clienti, cumu in un albergu », ricorda Marie Sachot. Nant'à l'alta strada, l'albergata apre sempre u primu di ghjugnu. U lindumane, cumenciarà a siconda parte di u scunfinamentu. Cù a pussibilità d'allughjà deci parsoni in un stessu locu ? Pocu prubabile. Tutte iss'incognite cumplicheghjanu u travagliu di gestione di l'agenti di u Parcu di Corsica. À iss'èpica

di l'annata, cumencia a preparazione di i rifugii. « Ci vole à mette in acqua i cundotti, à spazzà a pula, à accucià u materiale. I primi clienti ghjunghjanu da qui à un mese. S'è ùn li pudemu micca accoglie, ci toccherà à rimbursà li », conta José Filippi.

Sembra ch'in muntagna dinò, ci valerà à aspittà un pocu prima di pigghjà l'aria.

JEAN-PHILIPPE SCAPULA